



Hezbollah lenir inyaktsü
Naim Qassem shimogo

Nagaland Assembly küm 60 jungogo; Naga nunger azü ajanga Nagaland state aküm: S C Jamir

Kohima, October 29, 2024
(TYO): Nagaland Legislative Assembly (NLA) tenzüker küm 60 ajungba benjung Mongulbarnü mongogo.

Iba sentong nung Nagaland nung Chief Minister kümsük punguben inyaker aser taoba Governor, Dr. S C Jamir aden.

Naga nungeri bendanga agütsüba aser azü tenlabu sülen Nagaland state ya political agreement ka ajanga aküm ta Dr. S C Jamir-i "Down the memory lane" onük jemidang ashi.

Nagaland state ya odang akümba masü saka India sorkari Naga nunger ya khenyongi balaka ta agizükba sülen political agreement ka ajanga aküm. Indian Constitution nunga Arrla 371(A) benoka Nagaland nem jenjang balaka agütsü, ta pai ashi.

"Linük nung tanga state tem ya state sorkartemi ashiba nung ajemdaker reorganized asü saka Prime Minister's level nung yimten olemtepba sülen state akümbaji Nagaland dang lir. Iba ya kechiba ta süra India sorkari Naga nunger yimten putiotsü khenyongi balaka ta agizükba ajanga lir" ta SC Jamir-isa ashi.

"Sorkar ketdangsüa arur küm 60 ajungba dang masü saka asen democracy tanüla meremsepi aruba atema tetushi agüja iba benjung amonger" ta Nagaland Governor La Ganesan-ia ashi.

1964 nungi Nagaland Assembly ya ketdangsüba tongshi ka, nübortem ola metanga aoba ki ka aser nübortem taginüba atema noktakba assembly ka ama nyaka arur, ta pai ashi.

"Asenok ajaki Nagaland nung tesüba lennirtem aser state yangertem nem tetushi agütsütsü atema arua lir. Parnoki asen state



Taoba Chief Minister & Governor Dr. S C Jamir, Chief Minister Neiphiu Rio aser Governor, L Ganesan nungeri Nagaland Legislative Assembly 60 buba benjungmong nung o jembiba angur.

nung 371A, ali aser rongsen enoksem" ta pai metedaktsü.

"Nagaland ya Naga nunger tapayutsü azü agi alangtetba liasü. Iba lima atema Naga nungeri putu aika timtema aruogo. Anungji tang teinyakdak MLA temi Nagaland assembly ya Naga nunger ochishiba, tasü aitba aser teindang aliba reju ka kümduktsütsü ayongzüker" ta SC Jamir-isa ashi.

"Sorkar ketdangsüa arur küm 60 ajungba dang masü saka asen democracy tanüla meremsepi aruba atema tetushi agüja iba benjung amonger" ta Nagaland Governor La Ganesan-ia ashi.

1964 nungi Nagaland Assembly ya ketdangsüba tongshi ka, nübortem ola metanga aoba ki ka aser nübortem taginüba atema noktakba assembly ka ama nyaka arur, ta pai ashi.

"Asenok ajaki Nagaland nung tesüba lennirtem aser state yangertem nem tetushi agütsütsü atema arua lir. Parnoki asen state

putiotsü nung kodanga mesamatsüba maitsü yuja lir" ta Chief Minister Neiphiu Rio-i ashi.

"Parnok mangdang, temulungtetba aser bendanga agütsüba ajanga tanü asenok iba jenjang nung lir. Akümlı toktsür aoer tem nem tetushi agütsür aser parnoki senmang tajung yutsüba atema parnok akhümtsübur" ta pai ashi.

"Iba Assembly ajanga olemtip tajungtem agia aser mokokachi kecha melii Acts balala yangluar. Iba ajanga asenok tebilemba balala süaka külem tangatetba aliba aser kati ka akhümtsübur sayur" ta CM Rio-i ashi.

Nagaland Assembly-i maneni Naga nunger aliba tesem ajak ka akümtsü nükjidong atema inyaktsü. Naga nunger ajak ka akümtsüba ya 16-Point Agreement ajanga adok aser Naga political movement nung tongti shilem ka lir, ta pai ashi.

"1964 nungi Nagaland Assembly ajanga Naga-inhabited areas ajak ketdangsüba ka kübok

anioktsü atema bangzung trok tashi renemogo. Tatemsabuba ji 2018 nung agi aser onoki maneni iba alizüng atema inyaktsü" ta CM Rio-isa ashi.

Nagaland state akümba aser iba Assembly amenokba ya Naga Political Issue den sendaktepa lir aser Naga nunger nükjidong aser maitsü atema tongtiba lir, ta paisa shisem.

NLA Speaker aser Deputy Speaker na lenisüba kübok iba House ajanga sobaliba tajung maneni benshia aotsü, ta paisa ashi.

Küm 60 tashi Assembly Secretariat ajanga Nagaland nung democracy, tejakleni aoba aser telongjem atema noktaka arur ta NLA Speaker Sharingain Longkumer-i ashi.

"Küm 60 tashi Nagaland nung alirtem bendanga tenzüka aruba ajanga MLA temi asenok miembu state asoshi anibelem arema inyaka aruba kuli agütsür. Küm 60 tashi Assembly aruba ajanga constitutional mapa inyaka aruba

dang masü Nagaland nung alirtem taginüba, tayongzükba aser takoktem sayur" ta pai ashi.

"Taoba küm 60 tashi Nagaland nung sorkar ketdangsübare methitemi dang arur aser iba mapang Nagaland asoshi otsüsütsü aser tongtipang lemtettem agiogo" ta EX -PAN President & taoba Deputy Speaker NLA, Joshua Sumi-i ashi.

Nagaland Legislative Assembly aser taoba o tang teinyakdak Speaker temi EX-PAN züngsemtem nungita aser yaria aruba atema pelar, ta pai ashi.

Tanü iba sentong nung Assembly-i Assembly Secretariat Complex nung facility aika nüngja melenogo.

NLA nung mezüngbuba Speaker T.N. Angami nüngtem nung Botanical Garden; mezüngbuba Chief Minister P. Shilu Ao nüngtem nung Assembly Library; taoba NLA Speaker K. Shikhu, nüngtem nung Conference Hall; taoba NLA Speaker C. Chongshen nüngtem nung Committee room; aser taoba NLA Speaker Vikho Yhoshu nüngtem nung Training room nüngja melensiogo.

Maneni, Parliamentary Affairs Department-ia Nagaland nung taoba MLA shia nem laptop kaka agütsü.

Sentong nung mendenji Deputy Speaker S Toiho Yetho liasü, state chaplain Rev T W Yamyap Konyak-i temoatsü meshia sarasadem aser Nagaland Chamber Choir-i ken ka aten.

Ayushman Bharat kübok arishi küm 70 ser temapurtem dendaktsür

New Delhi, October 29, 2024
(Agencies): National health scheme Ayushman Bharat kübok arishi küm 70 ser temapurtem adentsü aser iba atema Rs 3,537 crore lemjütsür ta Prime Minister Narendra Modi-i Mongulbarnü metedaktsüogo.

Ayushman Bharat-Pradhan Mantri Jan Arogya Yojana (AB-PMJAY) kübok beneficiary temi empanelled hospitals nung Rs 5 lakh angur.

Iba scheme ya 2018 nung tenzük aser mezüngbo sensaker kibong crore 12.3 dak rangloker tenzük.

Linük nung arishi küm 70 ser tema nisung crore 6 jungnúa lir ta Centre-i asadangteta lir. Parnok aika Ayushman Bharat kübok dena lir aser aika Central Group Health Scheme (CGHS) amala government health plans nunga züngsema lir. Ajisüaka, Centre-i

kibong crore 1.96 nungi nisung crore 2.72 tashi Ayushman Bharat kübok talila bendenlokogo.

Beneficiary tasentemi registration asüba sülen Ayushman Vaya Vandana Cards angutsü.

Mongulbarnü Ayurveda Day tenüng nung All India Institute of Ayurveda (AIIA), Delhi nung sentong ka ayongzüka agidang PM Modi-i Rs 12,855 crore jungnúa indang maparen balala tenzüktsüogo.

Paisa U-WIN portal sayatsü aser iba ajanga kümchia mashisa tetsür crore 2.9 aser kinü tanur crore 2.6 shi ajangzüktsü ta asadangteta lir.

"Iba ajanga mashisa tetsürtem aser tanur (sozüklü nungi küm 16 tashi) nem vaccine-preventable diseases 12 anema vaccines agütsütsü" ta Centre-i ashi.

Ceasefire lir anungji AFSPA nüngdak mali: MP Supongmeren

Kohima, October 29, 2024

(TYO): Naga Students' Federation (NSF)-i Mongulbarnü 78 buba Foundation Day cum Seniors Consultative Meeting liogo.

"Centre aser Naga telungpur teloktem tsüngda ceasefire aliba aser yimjung olemtip agiba ajanga Nagaland nung AFSPA nüngdak madoker" ta Lok Sabha MP aser taoba NSF general secretary S Supongmeren Jamir-i ashi.

"1997 aser iba sülen nungi Naga national political groups pungu shi kati India sorkar den ceasefire nung lir. Külen, Naga yimten latettsü atema olemtipa arur anungji Nagaland nung Armed Forces Special Powers Act (AFSPA) nüngdak mali" ta pai ashi.

Lennirtemi AFSPA anema ola adoktsüla aser state sorkaria Centre dang AFSPA agentsü atema jembitsüla ta

Supongmeren-i ashi.

"Naga nunger li nung oil & natural resources agiteta magiba atema tebilemtsü abener kechiyong Assam-ibo küm aika Nagaland nung totzü aliba tesemtem nungi kilometre 1 jung-majung nungi totzü agiteta agir" ta pai ashi.

NSF-i iba tebilemtsü atema inyaktsüla aser Naga nunger ajangzüktsü atema totzü agiteta agitsüla ta MP Supongmeren-isa shisem.

Naga telungpur teloktemi tax tanen maka saruba khuret lir anungji AFSPA-i lanur Naga entrepreneurs dang tax memeshitsüla ta noktaktsüla ta paisa tebilemba lemsatep.

NSF ketdangpurtemi tesüiba maparen aser tebilemtsütem meyipa reprangshitsüla aser Naga nunger ajak ajungtsü mechii nung mapa inyaktsüla, ta Supongmeren-isa shisem.

"Mapang süia aruba dang

masü saka NSF-i telongjem, akanga noktakba aser mangdang senmangtem yutsüba atema benjungteper" ta NSF presidential address jemidang Medovi Rhi-i ashi.

NSF tentetba nungi Naga nunger tashi aser taginüba atema noktaka aru. Naga nunger temeten balala aser linük asoshi teimla aser ola ka ama NSF-i inyaka arur" ta pai ashi.

"Onoki Naga nunger telongjem atema maneni noktaktsü. Küm 78 tashi arudang NSF tajungba kümduktsüogo aser iba ya tejenpurtemi bendanga agütsüba aser mangdang tulu ayuba ajanga adokba lir" ta Medovi Rhi-i ashi.

Iba sentong nung mendenji NSF assistant general secretary Kenilo Kent liasü, Secretary education Temjentoshi-i temoatsü meshia sarasadem aser general secretary Chumben Khuvung-i anküp tepela o jembi.

Mokokchung nung Draft E-Roll atema metetdaktsür



Deputy Commissioner, Mokokchung indang Conference Room nung October 29, 2024 nü senden amendang tangokba noksa ka nung DC & DEO Mokokchung, Thsuvisie Phoji den sorkar kettangsür aser political party tem nungi teshimtet nisungtem angur.

Dimapur, Mongputeni/Oct.

29 (TYO): Mokokchung district atema Draft Electoral Rolls nung temelenshitsü lira October 29, 2024 nungi November 28, 2024 tashinung inyaktetsü, ta Deputy Commissioner & District Election Officer (DC & DEO), Mokokchung ajanga October 29, 2024 nü senden ka nung metetdaktsü.

Political party balala tenüng nung iba senden nung dena alirtem dang DC & DEO, Mokokchung ajanga tarutsü nung election junga agitetsü mechii Electoral roll nung aibelen mesüi ochishia inyaktsü ayongzüka liasü.

Senden nung Additional Deputy Commissioner & Electoral Registration Officer

(ADC & ERO) Mokokchung- ia Electoral Roll nung tejangja masuba noksatem ngutettsü indang rasaa ashi.

Kasa mapang Additional Deputy Commissioner & Electoral Registration Officer (ADC & ERO) Mokokchung, Chumlamo Huntsoe-ia sangdong ka nung 21-Tuli, 22-Arkakong, 23-Impur, 24-Angetyongpang, 25-Mongoya, 26-Aonglenden, 27-Mokokchung, 28-Koridang, 29-Jangpetkong aser 30-Alongtaki nungi electors indang Electoral Roll Draft Publication renema aliba metetdaktsü.

Item Draft Publication ya Registration of Electors Rules, 1960 nung aliba ama renem aser reprangtsü atema ADC office aser designated location/polling

station nung yuja lir, ta ashi.

Electoral Roll renemtsü asoshi qualifying date ya January 1, 2025 alitsü aser temelenshitsü lira tapet Form 6, 7 mesüra 8 nung zülur November 28, 2024 tashinung agütsütsüla, ta ashi.

Iba amala 'claims and objection' ajunga ADC & ERO office mesüra Booth Level Officer (BLO)/Assistant Electoral Registration Officer AERO) tonga arutsüla, mesüra shia aliba address dangi post asütsüla.

2025 küm qualifying dates April 1, July 1 mesüra October 1 nung arishi küm 18 ajungtsüpur senso ajungai electoral roll nung parnok tenüng inoktsü asoshi Form 6 nung zülur iba sangdong agütsüba anogo nungi agütsütsü akok, ta ashi.

WRD ajanga Mental Health seminar ayongzük

Dimapur, Mongputeni/Oct.

29 (TYO): Water Resources Department (WRD) ajanga World Mental Health ita nüngtem nung "It's time to prioritise mental health at the work place" omen nung ajemdaker WRD kettangsür aser staff tem asoshi seminar ka Chief Engineer Office Conference Hall, Kohima nung October 29, 2024 nü ayongzüka liasü.

Chief Engineer, WRD, Er. K. Hutoi Sema-i sentong tenzüka jembidang mental health ya ki o jen ama

tongtipang lir ta ashi aser kettangsürtem dang tzü nokdang ama pei indang mental health anepalutsü ayongzük aser asenoki tzü nokdang khen senzüka yutsüra tsünglanglen timtem tulu ajurutsü, ta ashi.

Asen mental health shidak melira asen mapa nung tetsüdkaktsü ajurutsü, ta pai ashi.

Paisa mental health shidak aliba ajanga asen mapa shidak inyaktetsü, anungji kanga junga anepalutsüla, ta WRD kettangsür aser staff tem ayongzüka liasü.

Iba seminar nung shisalen sayur ya Lovitoli Awomi, Counselling Psychologist, Founder, Lapiye Centre for Mental Well-being,

Chümoukedima aser Rev. Fr. Joe Mariadhas, Director, Shalom Rehabilitation Centre, Chümoukedima liasü aser tenati "Perceived Stress, Emotional Intelligence" aser "Mental Health at Work Place" onük nung ajemdaker jembi.

Iba sentong nung Er. Wapangnaro Imchen, Executive Engineer, WRD menden liasü.



NAGALAND POLLUTION CONTROL BOARD

Signal Point, Dimapur - 797112, Nagaland
Tel: 03862-245727, TeleFax: 03862-245726
Website: www.npcb.nagaland.gov.in e-mail: npcb@vahoo.com

AMBIENT AIR QUALITY FOR KOHIMA AND DIMAPUR CITY KOHIMA ASER DIMAPUR NUNG MOPUNG MERÜK-MEMERÜKBA JENJANG

Sl. no	City	Location of air station	Type of area	Monitoring dates		Permissible limit As per the National Ambient Air Quality Standards "Iba tasazuk alemabo metudaktsütsüla"
				22.10.2024	24.10.2024	
1	Dimapur	Bank Colony	Residential	63	73	100 µg/m³
2		Dhobinala	Commercial	188	160	
3		NPCB Office, Signal Colony	Residential	92	43	
4		Tenyiphe, Chumoukedima	Commercial	80	37	
5		Nagarjan	Residential	85	49	
6		Viola colony	Residential	38	37	
7		Burma camp	Commercial	97	108	
8	Kohima	Opposite NST Office	Residential	21	33	
9		PWD Junction	Commercial	68	37	
10		High School Junction	Commercial	67	51	
11		Midland (Upper)	Residential	36	41	
12		Forest Colony	Residential	70	41	

Iba osang ya nübortem ajangzüksü atema Nagaland Pollution Control Board-i agütsür.

Dimapur nung pensioner physical verification tenzüksü

Dimapur, Mongputeni/Oct.

29 (TYO): Senior Treasury Office Dimapur nungi itesen agizükba pensioner tem 2024 asoshi physical verification maparen November 11, 2024 nungi tenzüksü, ta sangdong ka ajanga ashi.

Pensioner tem dang pei indang Pension Payment Order Book bener latetja aliba anogo verification atema arutsü metetdaktsü.

Physical verification nung marurtem indang pension shibangba amai züngshitsü, ta sangdong ajangga ashi.

Chümoukedima district nung tzü anasa kumdanga alitsü tuyu

Dimapur, Mongputeni/Oct.

29 (TYO): Tawa tzütu ka nung tebur chanu ka arakseta asüba densema iba ama lendong balala ajuruba mechii October 29, 2024 nü District Disaster Management Authority

(DDMA) Chümoukedima ajanga nüburtem dang tzümeketa lendong nungi kumzüksü mera tali agitsü metetdaktsü.

Tzütu, tzüchi aser tzü aliba tesem nung tarutsü nung lendong ataloktsü aliba nungi nüburtem kumzüka alitsü mechii iba tekumdangtsü ya sangdonga liasü.

Deputy Commissioner and DDMA Chairman, Polan John, NCS ajanga ali-kimong kibur aser village councils temi tapet mera agitsü balala shia liasü.

DC Chümoukedima ajanga ashiba agi, tzütu teladak aser tarok mesüra ango tzübo amala kanga junga atsüdagtsüla, talisa tanurtem mesüra meimlai senzürtem malangtsüsa yanglutsüla.

Iba den külemi tekumdangtsü maitsü tejangja, talisa "WARNING DEEP WATER" amala tzü temeket nung ajaki angutsüsa ayutsüla aser kibur temi ali mesüra long agiteta ongken amala shibanga ayutsüla, ta ashi.

Item mera agitsü asoshi village councils nem mapa nungloksü aser DDMA ajanga nüburtemi amshiba tesemtem nung lendong majurutsüsa mera agia tarutsü nung lendong nungi nokdangtsü ayongzüker, ta sangdong ajanga ashi.

Longjang nung arishi küm 107 tetsür ka asü


Mkg. October 29(TYO):

Longjang yimti nung tsürabur Yimsangpangla Jamir arishi küm 107 ser ita ka

buba nung yashi alima nungi pilaoga.

La kinungbobo 1968 küm parnok toktsür iba lima nungi pila. Par Chirnurtem rongnung tebur 6 aser tetsür 5 Tsüngremi moaja liasü.

La den asüpila sentep sentong Longjang Baptist Arago nung agia liasü.



LIVINGSTONE FOUNDATION INTERNATIONAL
THAHEKHU / KEVIJAU, DIMAPUR - 797112 NAGALAND

2025-26 ADMISSION OPEN NOW PREP-I TO GRADE-IX

ENROL NOW

WHY CBSE??

- CBSE has its presence in more than 29000 schools in National and 240 schools in 28 foreign countries.
- CBSE is considered as one of the best boards in cracking Competitive Exams like UPSC, NEET, JEE, AIEEE, PMT, CDS, etc. as most of the questions are CBSE syllabus based.
- In comparison with many other boards of India, more than 60% of students who get into the IITs have CBSE background.

WE GROOM CHILDREN FOR LIFE!

- Forms available between 9:00am and 2:00pm at the LFI Accounts Section.
- 25% Concession in both Hostel & School Fees will be granted to students with excellent flair in Sports, Art, Music & other such skills.
- Students from NBSE Schools taking admission in Prep-I to Grade-IX may avail the UNIQUE FACILITY of ADVANCE CLASSES which will begin from JANUARY 2025 onwards so that they can have the advantage of an upper edge early on before the regular classes begin from April 2025. The fees for the ADVANCE CLASSES from January to March 2025 will NOT BE CHARGED.

LIMITED SEATS AVAILABLE

JOIN US ON SOCIAL MEDIA

- livingstone.nagaland@gmail.com
- [livingstonenagaland](https://www.facebook.com/livingstonenagaland)

Jammu and Kashmir nung kiralongrar asem tepsetogo



Jammu and Kashmir kubok Akhnoor sector nung security force aser kiralongrar na tananübuba khatepba tesem anasa alirtem adenshia aliba noksa nung angur.

New Delhi, Mongputeni/ October 29 (Agencies):

Jammu and Kashmir kubok Akhnoor tesem nung kiralongrartem maneni meita aoba mapang Mongolbarnü anepdang security force temi kiralongrar ana tepsetogo.

Hombarnü nungi meita aoba sentong ka tenzük aser kiralongrar asem tashi tepsetogo. Mongolbar anepdang Jammu nung Akhnoor sector kubok yimtsüng ka nung kiralongrar ana jenoka aliba samatsütsü asoshi nongshiba mapang telok ana tsüngda khatepa liasü.

Hombar anepdang Line of Control (LoC) anasa convoy ka oya aliba mapang kiralongrartem army indang ambulance ka dak injang khalokja liasü. Iba sülen nikongtsütsü special forces aser

NSG commando temi injang khalokja liasü.

Kiralongrartem ya Khour nung Jogwan yimtsüng kubok Assan temple anasa atsüka liasü. Mongolbar anepdang bomb apokba ola ana angashiogo iba sülen khatepa liasü. Meita aoba mapang arishi kum pezü tain valiant Army azü, Phantom injang agi khashiba sülen süogo, ta PTI sangdong ka ajanga metedaktsü.

Army-isa, surveillance aser iba tesem meketbang ayutsü atema BMP-II infantry combat vehicles pezü amshia liasü. Sepaitemisa, kiralongrartem atsüka alidak jangjatsü atema Helicopter tem amshia liasü.

Kiralongrar asem Deobar aonung arrtsü aden India-i aita liasü. Parnoki anepdang 6:30 ako shi nung ambulance ka dak rangloker Army convoy ka dak

Sepaitemi meyiper amakba

mapang iba convoy amakertem aremeli jena ao aser mapang tatsüka lir parnok ya basement ka nung jenoka aliba jangja aküm.

Iba sülen kiralongrar ka tasümg nguteta liasü.

Toba hopta Baramulla district nung kiralongrartem army indang gari ka amakba sülen sepai ana aser civilian ana

tepseto liasü.

Iba masüdang ano local doctor ka aser non-local aayanger trok, kiralongrartem Ganderbal kubok Gagangir tesem nung tunnel ka yangluu aliba tesem nung tepseto liasü.

Jammu and Kashmir

Lieutenant Governor Manoj Sinha-i, tai maketba nisungtem tenlabu azü jang ka danga metoktsüui ajak mang ayangtsü, ta shiogo.

PM Modi-i Delhi aser Bengal sorkar anema jembi

New Delhi, Mongputeni/ October 29 (Agencies):

Ato Kilonser Narendra Modi-i Mongolbarnü Centre indang Ayushman Bharat scheme benokba dak sendakba nung Delhi aser Bengal sorkar aitsüogo.

“Mapang ka nungbo nübertemi temang anepalutsü atema pei ki, ali aser jewellery tem yoka liasü. Tashidak tesashi anepalutsü atema taa agiba indang angashidang sensakertem adendena liasü.

Sen maliba ajanga temang anepalu mesütetsüsa akumba ajanga sensakertem kanga timtemdaktsür. Ni sensakertem timla makai aliba repranga melitet, ibayongji ‘Ayushman Bharat’ scheme tenzükogoo,” ta pai ashi.

“Sorkari sensakertem temang anepaluba mapa sen lakh 5 tashi teyari agütsütsü telemtemba agiogo. Ayushman Bharat scheme ajanga linük nung sensaker crore 4 shi ajangzükogoo,” ta paisa shisem.

Ato Kilonser Narendra Modi-i, Ayushman Bharat Pradhan Mantri Jan Arogya Yojana (AB-PMJAY) ya 2018 kum February ita amenoka liasü. Iba scheme ajanga kum nung kibong shia nem sen lakh pongu tashi temang anepaluba mapang intokba mesemtsü atema agütsür.

West Bengal aser Delhi sorkar napronglai iba scheme nung shilem magitsü atema telemtemba agi aser iba ajanga PM-i sorkar ana anema ya jembia liasü.

Sentong nung o jembia

NCB-i Delhi anasa meth lab ka putetogo

New Delhi, Mongputeni/ October 29 (Agencies):

Narcotics Control Bureau-i Mongolbarnü, Mexican drug cartel - Cartel De Jalisco Nueva Generacion züngsemtem den sendaketa aliba clandestine methamphetamine manufacturing laboratory ka putetogo.

Delhi anasa Gautam Budh Nagar kubok industrial area ka nung India nungertemi iba laboratory ya achaayanga liasü, ta NCB ketedangsürtemi metedaktsü.

NCB deputy director general (DDG) Gyaneshwar Singh-i ashiba agi, ken o dak sendakba nung nisung pezü puogo, kong Mumbai nung amendaker aliba chemist ka aser Tihar jail warden ka densema lir.

Kasa mapang nung NCB-i tang Mexico nunger ka tebushidak lir, shiba Cartel De Jalisco Nueva Generacion züngsem ka asütsü ta amanger aser pa ya iba temesepba mozü purity tendangtsü atema anir aruba asütsü ta temulung melemi bilemer. Pa ya Delhi nung liya liasü.

mapang Ato Kilonser-i Ayushman Bharat scheme indang metedaktsü aser ashiba agi, iba ajanga linük nung nisung crore 4 shi ajangzükogoo.

Healthcare dak sendakba nung development project tem aser arishi kum 70 tain tema tientet rogotem atema pai aniba sorkar indang flagship health insurance scheme Ayushman Bharat amenoktsüba mapang Ato Kilonseri ashiba agi, Delhi aser Bengal nung tientet rogotem iba scheme ajanga majangzüktsü, kechiyong parnok sorkari yimden yimsütsüba dak sendakba nung iba scheme mebenoki lir.

“Delhi aser Bengal nung arishi kum 70 tema tientet rogotem dang ni nenok metenzüktetba atema tatok meshir,” ta Modi-i ashi. “Nenok koma lir iba osangjibo ni angashitsü saka ni nenok meyarittsü, kechiyong Delhi aser West Bengal sorkar Ayushman Yojana nung madener,” ta PM-i ashi.

Delhi nung AAP aser West Bengal nung Trinamool Congress sorkar aija Modi-i, yimden yimsütsüba dak sendakba nung tajangzük angutsü atema pei state nung aliba shirangertem sentoka toktsüba ya mimchir anema inyaksangshi ka lir, ta ashi.

West Bengal aser Delhi sorkar napronglai iba scheme nung shilem magitsü atema telemtemba agi aser iba ajanga PM-i sorkar ana anema ya jembia liasü.



Ato kilonser Narendra Modi aser Health Minister JP Nadda nati New Delhi nung All India Institute of Ayurveda nung beneficiary ka felicitate asüba noksa nung angur.

NCB indang DDG Kumar Singh-i ashiba agi, “tanga linüktemi shibelentsü aser India nung achitsü atema methamphetamine amala synthetic drugs tem yanglutsü asoshi Delhi NRC nung laboratory ka amenoka aliba indang osang tejangja ka angazükba sülen NCB-i October 25 nü Kasana Industrial Area, Gautam Budh Nagar district nung factory ka meita ao aser Methamphetamine solid aser liquid form nung seret 95 nguteta liasü. Iba ken nung Mexican CJNG drug cartel (Cartel De Jalisco Nueva Generacion) züngsemtem densema lir.”

“Acetone, Sodium Hydroxide, Methylene Chloride, Premium grade Ethanol, Toluene, Red phosphorous, Ethyl Acetate amala chemical tem aser temesepba mozü yanglutsü atema bendanglen nungi bener aruba machinery tem ngutetogo. Delhi Police special cell-ia iba meita aoba sentong nung shilem agia liasü,” ta paisa shisem.



TIR YIMYIM

YIMOBILEM (EDITORIAL)

DIMAPUR RASEMNÜ, OCTOBER (MONGPUTENI) 30, 2024

Nagaland küm 60 sülen

Nagaland tatar senden kümteta yimten yimsürtemi Nagaland-a la dak apet temzung ozüng lateta yimsüsüa arur, joko ita ana sülenbo Nagaland Legislative Assembly-a küm 61 bubai ayaoktsü. Atangji, yashi iba yimobilem nung lemsatepba amato Nagaland state akümtsü atema 1960 küm July 28 nü 16 Point Agreement renemba sülen state tasenba yimten mapa tenzüka aotsü atema 1961 küm February 18 nü Nagaland kübok aliba Naga nunger kin shia nungi teshimtet nebo 42 agi akumba 'Interim Body' ka kümteta yimsüsütsü tenzük. Iba sülenang, 1962 küm India tatar senden nung state tasenba Nagaland dak aketba ken o benoka lemtet aser shitakba Nagaland state mesemteturajib 1963 küm December ka nü liasü. Anungji, ita ka lir, taküm küm December ka nü Nagaland state kümberbo küm 61 ajungbamung amongtsü. Atangji, tang Naga nunger yimten mopong aonba yagi ita ka ana tsüngda Nagaland tereprangtsü sorubangro aser yimten tensa tia melenshitsüa kecha ashitsü makokba tia ka nung iba yimobilem ya lemsateper. Mezung nungi Naga nunger tejangrabaji India anüdoklen aser Myanmar (Burma) anüolen tetsüngda nung aliba Naga kin ajak ya alia, tzüa aser nisunga ka kuma longjemer yimten ka kübok alitsüba ji liasü. Atangji, asenoki melongjemtet, meinyaktet aser metongteter dang ashi, Naga nunger kin ajak longjemer yimten nüchiso akaba lima ka akümtsüba Naga nunger temeten aser langa lir. Ajisüaka, asenok mashimalu, merajem aser shisatsü agi matongba ajanga tanübo Naga nunger kin kar India aser kar Myanmar nung ta lemsar alir. Ano, Naga nunger kin karbo kasa Naga kinsa ser nung yimtsüng kar India nung aser kar Myanmar ta aliba kintema lir. Item kintem rongnung Konyak, Khiamniungan aser Tangkhul kintem asütsü. Ibayongji, India o Myanmar na tsüngda nisungtem mesenzütetsüa atsü matsütsüla ta Naga nungertemi nokdaker, kechiyong tangar Naga kintemjibo yutsür Konyak, Khiamniungan aser Tangkhul nungertembo kasa pei nisung aser kasa kinunger yimtsüng aser kidangia moutettsüa akümtsü. Tatsüba agi, Mon district kübok aliba Longwa anghbaer ki tiyong nung India aser Myanmar na atsuji atsütsüa akümtsü. Aji yutsür, tang metenser Naga nunger lushi tiyong nung tilaka aroketa akumba amai Nagaland state kuma aliba nungia Nagaland anüdoklen alir kintembo yimten balaka kümteta alitsü temulungtetba nung inyakdag. Aji oda, Nagaland nung yimten lenirtemi Naga yimten ken o India den shitak jembia odagi ta yimjak nungbo metedaktsür saka külén Naga nunger yimten nüchiso bushir telokbo teimba-teimba kuma telemsa adoker aser külén Nagaland agia ana kümde asür ta asüba tensa tia nung Nagaland küm 61 buba nung mejaoktsü. Joko, Naga nunger asoshi Naga kin ajak longjemtsüba to masü saka tang longjema aliba telongjem yaa akangshitsüa mekoki kümogo. Iba ama tensa tia ka nung, talisa, Nagaland Legislative Assembly nung temendak pur tatartemi, parnoki lemteta akaba ama, Naga yimten tebilemtsü ya tangsa tang kokteta telatetba ka dangi arutettsüla. Alima yimten nung ajaki mulunga agizükba ken o aikabo malitsü, saka tensa mapang apir kechi shitak ta asüba tangatetba nung ken o latetra, tanü asoshi dang masü tarutsü nunga shitakji shitak asütsü. Atangji, yimten nung khuret abenertemi yimten ajungtsü atema tenla aika agütsütsüa adoktsü, item tenlatemjii yimten nung mena aliba menden, nüngang aser maongka asütsüa akok mesüra rongsen asütsüa akok. Atangji, Naga nunger anüdok aser anülulen alirtem ajak pei jangraba yimten jenjang nung yutsütsüba junger, kechiyong asenok kangshitepa külémi ki ka nung alitsü menüngdaker. Ajisüaka, kong kechi yimten jenjang nung lidir liaka Naga nunger kin ajaki Naga nunger ta shitak, Naga nunger arok yimli aser telongjembo aji dang asütsü.

OLEMSABANG

Oh Kibuba Ni Makakah

~ S. Aosüngküm Ozüküm

(Yashi adok nungi...)

Saka Oh, Kibuba küm menen yari ne tenzüker dang tebenshima. Kechiaser ni ne tashi metizüksü, ni lisem jang kata memeyong. Oda küm metemsüba dang apayurdangshi, ni na anema inyakogo. Kü taküm, tangula nai mapayuli süra shibai ne dang kechi ashitsü. Ni ashir, na temang meyipzüdang khen nung samatsütsü koka lir. Ni ajungli ka dang süaka, telunglen tangula na mesüka apuoktsü. Aji ne meyong asünung, tatem maka tepeladak ne den lidaktsünür. Oh! Sentsüwangshi chuba, alima ne tsüng ajemidak ta ni metet. Aser Kodak ne menden Temeshiba tenem nung mener Nai chubar. Atangji meyirejang ter kongki ola den na asangtsü tetemsü lir. Saka ni tamashi nisung asünung moiing den akang tembar aküm. Joko pai ni ne dangi tanaben shilangtsü memelunger aser soter. Kü tetsüng aser teka anatsülen merangsen agi alener mesüshishir. Oh, küm Tsüngrem ni alima tepela arishibayong ana tsükchir aküm, Aji oda ni küm menen ajunga nangzüktetra aser nüktzü aneta jepra, Ana ajuruteptsü tesem kabo ngudima ta ni ne dang aakseta mepishir. Shibaibo peii alangzükba senti taküm ka mashileni aodang pelatsü, Kibur masüba kati sentaker anishidang, shitakba Kibuba mejashilima? O, Kibuba ni mesüzsüksang moiing nem nai ozüng ka agüjangma, Kechiaser ni ne den alidang jokdena pelaba ajak to samaadokogo. Pai küm dang ashi, pa kija ponglang makaba mimong jagi molunür, Ni asüngdang aser ni rasaa ashi, ni ajak madak Kibuba ka tenzüker, Kodaser ana külémi molumi ongkeni aitsü, aji tamakoktsü ta ni ashi, Saka pai ashi, kechiyong nai ne Kibuba toktsü aser küm sülen anitak. Tulusang Kibuba tangsa tang ne teka tajiji yoka ni atsütetangma. Hau ni na anema aibelen jentinangka inyakogo, ni teyazür kümogo. O, tetsübutsu Tsüngrem, küm aibelen apibo menoksar intoktsüa lir. Ni Ne Temeshiba Kilembok nung rongsen dak tenük jalua reprang, Hau, Ne Temeshiba juli aser Temeshiba langbang sensamasatsüogo, Saka item ajak nungi küm tetsüng atsütetogo aser ne dangi asemer. Yonai ashiba ama, ni tzüyim nung ajungokjang, ni temulung meyipdi. Kechiaser küm aibelen mechı amangbapur ne tsüngdang tai mennar, O, Kibuba ni merenshiang, saka Yob den saku taküm tesamatsüma. Ni mima agiba rongsen menoktsüa arishi langjang aser moajang. O, Kibuba küm temenenyong, temeimtsü adianu ka rishikangshidagi, Aji ni maak mesünüdang metetsümonga kar kangshir ta ni metet. Ajak yanglusang, ajak metetsang, ajak angusang, na tatem maka, Ne O bendangba kanga ochi aser atangji teindangba lenmangji na, Ni ama memerükba ka nem Temehiba kishi lapoktsüdimna ta atar, Tashi mangaaka, metemsüba taküm ka süaka, nüktzü yima mepir.

(AMEN)

Iba Olemsabang nung lemsaba ken-o aser shisatsü ya iba ocet züldü
bilemba ken-o ama tazüngeri angateta agitsü mepishir

Boko Haram-i nisung tepsetba video prokshir Khristanpur tetsübo nung lir



Mongputeni/Oct. 29

(Agencies): Nisung pezü tepsetba indang video ka sayaba

sülen Open Doors ajanga Nigeria nung Islamist extremists temi Khristanpur amaktsü asoshi shisaboluba lemsatepa liasü.

Nisung pezü tepseter ya Boko Haram telok nungi südi ta amanger, aser parnok ya Islamist terrorist jihadist organisation ka lir, koba ajanga Nigeria aser kidanger linüktem nung nisung meyirijang aika tepsetogo.

Iba video nungya nok-nü bina aliba kiralongrak tem yagi Hausa oshi nung jembia tereprangertem dang tepseter ronung tetsür ka pa tenu lir ta ashi.

“Tanü onoki tepsettsü aliba temen tem rongnung la ya ka lir. Tetsür aser tanurtem densema asen tamangba yimsü anema aor temi kasa tia

ajurutsü,” ta pai ashi.

“Kong temen nisungtem lir, aji bushia onok aotsü aser tepsettsü,” ta pai ashi.

Iba video nungya nisung pezü tepset. Open Doors UK aser Ireland ajanga asürtem ya Khristanpur asü masüar mejangka ta ashir, saka Nigerian Khristan tem ika ama timtem mela-mela ajurur, kechiaser parnok ya temen temen ama bilemer.

“Boko Haram extremists temi mapang shia parnoki temen temen ta ajaba nisungtem anema tashi ajak amshia rara ta jangga-jangga shia arur. Parnok asoshi temen temen ya parnoki angazüka amshiba Islam sülen manidakertem lir,” ta Open Doors’ legal expert for sub-Saharan Africa kati ashi.

“Iba mapang list nung mezungpur ya Khristanpur liasü, kechiaser parnoki tamangba yimsü mechik parnok

dak tenük yoker.”

Iba ama timtem liaka Nigeria ketdangsür temi mangattep aliba resettlement programme ka tenzükba ajanga azüdokshi mechi northeast nungi pei ki yutsür jena arurtem jenokba displacement camp tem shibanga liasü. Parnok ya tang pei ki alileni ogo, kong lendong ajurutsü jenjang nung lir, ta ashi.

“Pei kidangi meyipa shilanger nem ketdangsür temi chiyongtsü mesüra khen atema sen agütsür.”

Tesem balala nung prokshia aliba Khristanpur pei kidangi tanaben meyipa shilangtsü nungnanger, kechiaser parnok kumzüka mali aser parnok yimtsüngtem nung mines tem rema lir. Meyipa meshilangba Khristan tem telungpur temi amak aser ano jena ao.

Open Doors researchers temi küm tetenzüklen northern Nigeria semdanga liasü aser pei telidak ki yutsür jena aoba ya talisa Khristanpur dak azüdokshiba aser ketdangsür temi item mapa tamajung menokdangtetba ajanga lir ta bushitet.

Open Doors ajanga alima nung Khristanpur alitsü linük tamajungtiba 50 asadangba 2024 World Watch List nung Nigeria ya jenjang trok buba nung lir.

Lebanon nung raraba ajanga nun temi refugee 800 yaritar

Jaboule, Mongputeni/Oct.

29 (Agencies): Israel-i bomb poklokja amakba ajanga timtem ajurua aliba nüburtem asoshi aroko ka nung sisters temi kishi lapoktsüba sülen Lebanon rara nungi jena aor refugee 800 dak tema yangji jenoka lir.

“Bomb pokloktsüba mezung aonung nisung aika onok den jenoktsü asemtepa aru. Onoki mayimjemer aser joko maniokteter,” ta Jaboule nung aliba Convent of the Sisters of Our Lady of Good Help nung superior general Mother Joselyne Joumaa-i Catholic charity Aid to the Church in Need (ACN) dang ashi.

Iba aroko yagi yangji school ka aser tsürabur malirtem anepaluba tesem lapoka lir, aser northern Beqaa Governorate nungi aruba refugee tem anenzüksü asoshi tesem anaprong ya lapoka lir.

Mother Joumaa aser sisters danga 14 ajanga anogoshi refugee tem asoshi chiyongtsü renemtsü aser ACN ajanga chiyongtsü aser mozü densema emergency aid tem agütsür.

“Parnok temulung raksaba aser asüng asoshi tetsübo lemsatepsü onok dangi aru.

Aser onokia parnok nüngdakba nung telangzüba agüja yaritsü meranger,” ta Mother Joumaa-i ashi.

Sisters tem yagi internally displaced persons (IDPs) nem parnok nüngdakba agütsür aser parnok timtem angar. Parnok tila tanurtem asoshia sentong balala ayongzüker. Refugee aikati sisters tem den parnok mapa nung yaritepa, sünge bendener, osettsüset belener aser sorochiokdak yariteper.

Refugee aika tekülem kidang anisüngzük angur, aser tesunep atema sarasaderem. Ajisüaka Mother Joumaa-i parnok tarutsü asoshi khuret bentsür.

“Mongpu arur. Onoki komasür heating, electricity aser tzü tatsük agütsü? Asüng asoshi bilemba ajanga onok temulung ajema akumer, kechiaser anogoshi tebilemtsü ulura lir,” ta lai ashi.

“Ajisüaka onok mission ya maneni tamang nung yariteptsüba ya lir, aser sarasaderem agi onok yaritsü ayongzüker.”

Ajisüaka iba mepetmesü ya ajanga sisters temi refugees tem dang Khristanpur yimya

sayur, kechiaser parnok aika Muslim nunger lir, ta Mother Joumaa-i ashi.

Blessed Virgin Mary ajanga bendanga agütsür tenzükba ngua nung aika temulung asür, aser Islam akumtsüboa tamangba yimsü ana tsüngta apu latsür, ta lai ashi.

“Lebanon nungi jena aruba tsürabur tem tetsübo agi sünger pei tanurtem mashishitet alidang Sisters temi parnok anepalua Tsüngrem ki nung parnok kumzüka lir ta angatdakstsütsü meranger,” ta lai ashi.

Region nung rara maneni ulua akumdang ACN yagi kibong meyirijang aika nem chiyongtsü aser mozü agi yaritepa arur. Lebanon nung aliba school tem ya timba nije indang lir, anungji ACN yagi tuition fees agüja pastoral programmes tem asoshi yaria arur.

Parnok Lebanon nung aliba arogo maneni yaritsü merangba mapang parnoki sen £830,000 dak tema bendentsü sentong ka tenzükba alima tesem balala nung aliba Khristanpur dang sarasaderemtsü ajungshir.

ANOGO ABEN TSÜNGREM DEN

Tsüngremer mezüng tentet- Lipok 1: 24-31

Tsüngremi kibongji tentet. Ibai Pa mezüng tentetji lir ta asenoki bilemtettsüla, aroko dang nungi kanga tainba. Anungji asenoki kibongji asenoki metetba tentet tongtipangtiba ta sangdongtsüla aser akangshitsüla. Kibong akhüm metsübubaji asenok asoshi amajok.

Kechiba kibongji kanga tongtipang? Iba tasüngdangba telangzüba aika agütsütsü akok. Tongmelang agi telangzüba kar:

1. Kibongji nisung ka aintsü asoshi tesem tajungtiba Tsüngremi tentet.
2. Kibongji meimchir asoshi telungjem aser mapa inyakba tiyongtsü asütsü tebilemba nung tenzük.
3. Ibai kibong nung alir ajak asoshi jenokdak akhüm aser anisüngzükdak alitsü tentet.
4. Tatemsia kibongji jakla yangludak aser jenjang yangludak asütsü tentet.

Ajiang! Meimchir lokti tentet nung kibongji tongtipangtiba tentet lir. Tsüngremi kechi nükjitung nung kibongji tentet ibaji mezüngbuba jenjang nung yutsütsü asenoki mulungtetti.

Itemi shisadangang: Asenok lokti nung kibong nung kechi ataloker?

Kibong nung aliba yimya (style) tanga kati melentsü nai kechi bilemer?

Kibong atema Laishibaren tebilemba inyaktsü nai kechi bilemer?

Sarasadem : O Kibuba, Ne telatet ozüng kü dang sayuangma, aser aji ni tatem tashi benshitsü. T.Ken 119:33

Tenangzükba : Kibuba tajung aser tindang lir; anungji Pai temen temen pur dang lemang sayur.

Islamic sayutsüngir Naik-i Khristanpur anema jembí

Pune, Mongputeni/Oct. 29

(Agencies): Mangatettep agi sünger aliba aser pei sasa

“Pakistan nung kin tilaka dang süaka Khristanpur ya yimzung meimba nisungtem lir, ajisüaka Naik-i parnok amokmerena o tamajung jembí,” ta Mumbai nung amenoka aliba NGO Harmony Foundation indang chairman Mathai-i ashi.

“Dr Zakir Naik-i ano maneni Pakistan nung Khristanpur timtemi yoktsü tebilemba nung asaa o tamajung jembí, koba ajanga 2015 küm ama tensa ataloktsü akok, kong Libya nung Islam dangi temulung meyiptüsü memulungba yong Khristanpur 21 tekol tangzüka yoka liasü,” ta Maharashtra State Minorities Commission nung taoba vice chairman-i alitsü.

“Dr Zakir Naik-i ano maneni Pakistan nung Khristanpur timtemi yoktsü tebilemba nung asaa o tamajung jembí, koba ajanga 2015 küm ama tensa ataloktsü akok, kong Libya nung Islam dangi temulung meyiptüsü memulungba yong Khristanpur 21 tekol tangzüka yoka liasü,” ta Maharashtra State Minorities Commission nung taoba vice chairman-i alisang Dr Abraham Mathai-i October 28, 2024 nü sangdong ka nung ashi.

Naik-i jembiba ajanga Pakistan nung Khristanpur tsübokdaktsü, temulung yirutsü, mezüngmeshi aser tali amokmerener. Lokti tulu nung pai sashi-sashia langzüba ajanga Khristanpur anema tashiyim amshitsü ajungmesor, ta ashi.

Naik-i asaa Pakistan nung Khristanpur anema mapa tamajung inyaktsü metsü proker, koba pa ainshiba sülen mela-mela tenzüksü, ta ashi.

Kin tilatem, talisa

Dr Naik-i tang Pakistan semdanga mapang Khristan yimsü anema tai aputsüsa o jembia yangji tamangertem jashitepdaktsü, shirnok kin tila lir aser tamangba yimsü mezüngmeshi ta tiazü nung tai tali ajungmesotsü, ta ashi.

AO OSHI ANGAZÜKDÄK:**TANÜ ANGAZÜKTSÜBA OJANG**

Tir Yimyim

Taputapu


(adj) shilem balala aika (variety)

* Ozü dokan nung chiyongtsü taputapu ayoker.

Taputsüng

(n) shiruru tetsüng tejaklenba (foreleg)

* Obalai ak taputsüng ka alia bener aru.

OLONG PAITEP # 6966**TIPLÉN**

- | | | | |
|------------------------------|-------|------------------------------|-------|
| 1. Inyaker ajangtetba | - (3) | 1. Meshidak | - (3) |
| 3. Bangsemo adokdak | - (5) | 2. Tanaben soshir | - (7) |
| 6. Shitak mesüi inyak | - (7) | 3. Iba anogo | - (4) |
| 7. Ya mimong nung angur | - (3) | 4. Meshi | - (3) |
| 9. Reprangzük | - (4) | 5. Yagi mi tsükloker | - (9) |
| 10. Tasola | - (5) | 6. Shi tapu ka | - (9) |
| 11. S ____ | - (4) | 8. Yagi ayimer saka ozü masü | - (3) |
| 13. Yagi ajak ashiocksür | - (3) | 9. Ajokba shiruru ka | - (7) |
| 15. Ki aokba oset | - (7) | 12. Inyaktet | - (4) |
| 17. Ak shi nung inokba tasen | - (5) | 14. ____ hi | - (3) |
| 18. Ishika | - (3) | 16. Akümlü nungi pilar | - (3) |

LANGTSÜNGLEN**OLONG PAITEP # 6965 TELANGZÜBA****TIPLÉN :**

- | | |
|---------------------------------------|-------------------------------------|
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kioctsü, |
| 9. Kin, 10. Teti, 12. Süir, 13. Jen, | 5. Lenti, 7. Tajangzük, |
| 14. Ola, 16. Talak, 17. Mazük. | 11. teronem, 12. Sempa, |
| | 13. Jahaz. |

LANGTSÜNGLEN :**NAI-A YA METETTER MA**

Tech Entrepreneurs Association of Mumbai (TEAM) aser Made in India ajanga ayongzükba

MumbaiHacks-i Guinness World Record ka yangluogo. Iba sentong atema nisung 3,000 jungnúa tenüng agütsü saka hackers 1,460 shimteta shilem agi aser iba ajanga "most number of participants in a generative AI hackathon" otsü yanglutet. Iba hackathon nung Meta, NVIDIA, Quantiphi aser ATLAS SkillTech University-ia teyari agütsü aser ATLAS SkillTech University, BKC, Mumbai nung October 25 aser 26 anogotem among.

Manipur kübok district 6 nung prangpong-injang aika ngutetogo**Guwahati, October 29, 2024****(Agencies):** Manipur nung security forces-i tesüiba anogo ishika tsüngda district 6 nung bushisüngdanga aodang prangpong-injang aika ngutetogo.

Imphal East, Imphal West, Churachandpur, Kangpokpi, Bishnupur aser Thoubal district tem nung prangpong-injang 22, explosive devices (IED), injang aser tanga combat materials aika ngutetogo.

Indian Army, Assam Rifles aser Manipur Police-i Kangpokpi district kübok Laimaton aser Aigejang tsüngda .303 sniper rifle, 9mm carbine

machine gun, 9mm pistol, a single barrel breech loading (SBLB) gun, grenades aser injangtem angu.

Ano, Assam Rifles aser Manipur Police-isa Thoubal district kübok B Phainom village nung 9mm carbine, pompi shotgun, grenade aser injangtem angu.

Imphal East district kübok Lairok nunga Indian Army aser Manipur Police-i Army dog ka anir bushitepa aodang 2-inch mortar, .303 rifle, double barrel rifle, pistol, Pompi gun, grenades aser injangtem angu.

Churachandpur district kübok Teibung village nunga .303 rifles, .22 mm semi-automatic rifles, large country-made mortar (pompi), 12 bore pistol aser injangtem angu.

Bishnupur district kübok Uyungmakhong village nung Indian Army, Manipur Police and Central Reserve Police Force (CRPF)-i self-loading rifle (SLR), IED aser grenades ngutet.

Imphal West district kübok Shantipur Makha Leikai Shamushang village nunga Assam Rifles, CRPF aser Manipur Police-i single barrel bore rifle, 9mm pistols, grenades aser injangtem angu.

Meghalaya CM-i SSA tesayurtem asoshi job security nangzüker**Shillong, October 29, 2024****(Agencies):** Meghalaya nung Samagra Shiksha Abhiyan (SSA) tesayurtem nem job security agütsütsü atema policy ka yangluang ta Chief Minister Conrad K. Sangma-i ashi.

Tura nung Meghalaya SSA School Association (MSSASA) teshimet telok ka den jembidang "services regularize asütsüba policy meyangludang tamasa security atema policy ka tesayurtem den jembiteptsü" ta ashi.

ta CM Conrad-i ashi.

Tesayurtem teloki Meghalaya sorkar dang ita ana tsüngda SSA tesayur 13,000 tema mapa kümzüka ayutsü atema policy ka yangluang ta mapang atakzükja lir.

CM Sangma den ajurutepba sülen Meghalaya SSA Schools Association (MSSASA) Aristotle C Rymbai-i "senden kanga junga menogo aser tesayurtem security atema policy ka yangluang imlar" ta ashi.

October 24 nü Meghalaya cabinet-i tang teinyakdak SSA tesayurtemi government teaching positions application atema upper age limit 45 asütsü mulunga agizükogo.

Iba ya lower primary nungi higher secondary schools atema recruitment atema lir.

North Garo Hills District nung Chief Minister Conrad K Sangma menden ser cabinet senden nung iba lemtet agiogo, ta Education Minister Rakkam A Sangma-i shia liasü.

Silapathar nung kinü tanur ka Rs 30,000 yong yokdok**Guwahati, October 29, 2024****(Agencies):** Assam kübok Dhemaji nung kinü tanur ka Rs 30,000 yong yokdokba atema osang lir.

Iba ya Silapathar nung atalok aser Dhemaji Child Welfare Committee (CWC)-i iba atema ken o ka benokogo.

Kinü tanur tsüraburtemi tanur süogo ta osang ashi aser iba sülen Rs 30,000 yong yokdok.

Tanurji Assam Medical College and Hospital, Dibrugarh nung aso aser mezüng paediatrician Dr Chandjit Doley'er kidangi medical treatment atema anir ao ta bushisüngdang ajanga bushitet.

Ajisüaka, Nilakh, Dhemaji nungi apuani nati Silapathar nung alir ka dang Rs 30,000 yong tanurji yokdok. CWC Chairperson-i tatalokba metetba sülen bushisüngdang asütsü atema ken o ka benokogo.

Kinü tanur yokdokba



Salima Tete India tetsür Hockey team captain kümogo



Mongputeni/October 29, 2024 (Agencies): Asian Champions Trophy atema Hombarnü India tetsür hockey team nung asayar 18 tenüng sangdongogo aser iba team captain asütsü Salima Tete, shimogo.

Iba asayamung ya tawa yangluba Rajgir Hockey Stadium, Bihar nung November 11 nungi 20 tashi asayatsü.

Team nung Navneet Kaur vice captain asütsü. Taoba küm Ranchi nung iba Asayamung atema team asayamung asayaba mapang shimba aser ternemshiba

indang jembiba mapang Tete-i, "asayamung tongtibang ka nung India team anir asayatsü jaugradema bilemer, aser talisa onok iba asayamung defending champions lir," ta ashi

"Onok kanga meranga training agiogo aser team nung asayar tejen aser tasentem ajak meyoktepa lir. Onok indang title defend asütsü aser taoba küm asayaba ama kasa tejangraba aser temulungtetba nung asayatsü onok nükjidongji lir," ta laisa shisem

Team nung goalkeeper ji asayar tejen Savita aser lanur asayar Bichu Devi Kharibam na asütsü.

Sushila aser Beauty Dungdung na rehabilitation takok ngua tembangba sülen team nung tanaben züngoksemogo.

India team:

Goalkeepers: Savita, Bichu Devi Kharibam.

Defenders: Udita, Jyoti, Vaishnavi Vitthal Phalke, Sushila Chanu Pukhrambam, Ishika Chaudhary.

Midfielders: Neha, Salima Tete, Sharmila Devi, Manisha Chauhan, Sunelita Toppo, Lalremsiami.

Forwards: Navneet Kaur, Preeti Dubey, Sangita Kumari, Deepika, Beauty Dungdung.

Spain nunger asayar Rodri-i Ballon d'Or agizükogo

Mongputeni/October 29, 2024 (Agencies): Spain nunger aser Manchester City midfielder Rodri nem Hombarnü Ballon d'Or award agütsüogoo.

Arishi küm 28 tain asayar yagi Real Madrid nungi asayar Vinicius Jr aser Jude Bellingham na ajateta iba teetushi agizükogo. Taoba season Rodri-i kanga junga shilem agiba ajanga Manchester City puri Premier League title pezübuba abenba nung tongtibang shilem agia liasü.

Iba den bendenloksema pa nem taküm European Championship nunga best player naroküm agütsü, koba Spain-i otsüsütsüsa pezübenbuba kokogo.

Defensive midfielder tem rongnung Lothar Matthaus-i 1990 küm iba naroküm agizükba sülen defensive midfielder tem rongnungi Rodri-i tang mezüngbuba Ballon d'Or agizükogo aser Alfredo Di Stefano (1957 aser 1959) aser Luis Suarez (1960) na sülen pa ya iba tetushi agizükba Spain nunger asayar tasembuba kümogo.

Spain team-i 2010 World Cup aser 2008 aser 2012 Euros kokaka iba mapang asayar kati danga Ballon d'Or award mangu aser küm 60 dak tema Spain nunger asayar kati danga iba naroküm ya mongui arur tang pai iba naroküm agizükogo.



Manchester City-i England nung football asaya amokbanger asayaba aser Spain-i Europe nung asendenshir kanga junga asayaba mapang Rodri-i tongtibang shilem agiogo aser iba ajanga pa indang coach, Pep Guardiola-i pa ya alima nung midfielder tem rongnung tajungtiba ya jatsüogoo.

Kasa mapang nung Rodri indang national teammate Lamine Yamal nem Kopa Trophy for the best Under-21 player naroküm agütsü aser Aitana Bonmati-i küm anabuba atonga tetsür Ballon d'Or award agizükogo.

Jennifer Hermoso nem Socrates Award agütsüogoo. Iba naroküm agütsüba sentong nung Real Madrid pur maden saka parnoki men's club of the year naroküm agizük aser manager Carlo Ancelotti-i a men's coach of the year award agizükli liasü.

Women's best club award Barcelona-i agizükogo. Parnoki toba season European aser Spanish league naprongla koka liasü.

Gary Kirsten-i Pakistan white-ball coach mapa toktsüogo



Mongputeni/October 29, 2024 (Agencies): asayatsü sangdongogo."

Taoba mapang South Africa nunger batsman Gary Kirsten, shiba lenisüba nung MS Dhoni-i aniba India team-i 2011 ODI World Cup koka liasü, pai Pakistan white-ball cricket team head coach mapa toktsüogo.

Pakistan Cricket Board (PCB)-i X ajanga Kirsten-i pa mapa nungi anentsü atema shiti yokba agizükba aser tang Test team coach Jason Gillespie lenisüba nung Australia den ODI aser T20I asayamung asayatsü telemtetba agiba indang officially metedaktsüogo.

"Gary Kirsten-i resignation shiti agütsüba agizükba sülen Pakistan Cricket Board-i tanü Pakistan cricket team taruba ita Australia den white-ball tour Jason Gillespie lenisüba nung

mapang Pakistan fast bowler Aqib Javed-i anir selection committee tasen ka shimba sülen tawa asayartem shimsüba tashi tena ket nungi agina liasü.

Committee tasenba nung taoba mapang International Cricket Council (ICC) elite umpire Aleem Dar, taoba mapang asayar Azhar Ali aser Asad Shafiq, aser cricket analyst Hassan Cheema nunger densema lir.

Kirsten aser taoba mapang Australia nunger fast bowler Gillespie na April 28 nü white-ball aser red-ball coach asütsü shima liasü aser Pakistan team asüngsanshitsu atema nongloktsü, kechiyong team tang international cricket nung junga masayatetba mapang ka lir.

Tena shimba ya jenjang kanga tajung ka agiba ama züngshi aser tenaprongla dang pei team shimtsü aser achaayangtsü asoshi sadem sadema inyakdaktsütsü tenangzükba agüja liasü.

Ajisüaka PCB-i taoba

Kirsten aser Gillespie na den Pakistan Test aser limited-overs captain tem selection panel nungi aginogo, shirnoki England den Pakistan team tanabuba aser tasembuba Test atema asayar shim aser iba sülen Deobarnü ODI aser T20 team sangdongogo.

Pakistan-isä, team sangdongba sülen mapang tatsüka dang lir white-ball captain mapa abentsü atema

Mohammad Rizwan aser pa nem teyari agütsütsü asoshi all-rounder Salman Ali Agha shimba sangdongogo.

Javed aser PCB Chairman Mohsin Naqvi nati Rizwan shimba sangdong aser iba inyakyim nung Kirsten densema maliasü. Team sangdongba mapanga Kirsten indang meshisem.

Wade international cricket asaya nungi anisüngzüker



"Taoba T20 World Cup tembangba sülen ni international jenjang nung asayatsüba mapang tembangba arudar ta jangja liasü. Ni international asaya nungi anentsüba aser coach mapa abentsüba indang taoba ita trok kanga jembishinüa aruogo," ta Wade-i ashi.

"Toba küm ishika coach inyaktsü atema asadanga aruogo aser tiaka maongka kar ngutetogo aser iba atema ni kanga pelar aser yongya atar," ta paisa shisem.

Wade Australia team nungi T20 asaya 92 nung asayaogo aser iba mapang run 1,202 yangluua liasü.

One-day internationals asaya nung pai asaya 83 nung run 1,867 yangluogo. Pa indang average 26.29 liasü aser pai century ka aser half century 11 yangluua liasü.

Maneni Test asaya nunga Wade Australia team nungi asaya 36 nung asayaogo. Pai century pezü yanglu aser 2019 küm Ashes akokba team nung pa densema liasü. Wicketkeeper ka ama pai asaya format ajak nung catch 240 asü aser stumpings 26 süja liasü.

BILEMDANGANG

"Na temalenı ajungkettsütsürtem den dang medemang."